



**KEMENTERIAN WILAYAH PERSEKUTUAN**  
Blok 2, Menara Seri Wilayah, Presint 2, 62100 Putrajaya  
Tel: 03-8000 8000 Faks: 03-8889 7957  
Laman web: [www.kwp.gov.my](http://www.kwp.gov.my)

---

## **SIARAN MEDIA**

### **UNTUK LIPUTAN MEDIA MASSA**

### **KEBAWAH DULI YANG MAHA MULIA SERI PADUKA BAGINDA YANG DI-PERTUAN AGONG AL-SULTAN ABDULLAH RI'AYATUDDIN AL- MUSTAFA BILLAH SHAH IBNI ALMARHUM SULTAN HAJI AHMAD SHAH AL-MUSTA'IN BILLAH BERCEMAR DULI MENGURNIAKAN RUMAH WILAYAH PRIHATIN KEPADA 54 PENERIMA TERPILIH**

**KUALA LUMPUR, 10 September 2020** – Kebawah Duli Yang Maha Mulia Seri Paduka Baginda Yang di-Pertuan Agong Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah serta KDYMM Seri Paduka Baginda Raja Permaisuri Agong Tunku Hajah Azizah Aminah Maimunah Iskandariah binti Almarhum Al-Mutawakkil Alallah Sultan Iskandar Al-Haj berkenan bercemar duli ke Majlis Pengurniaan Rumah Wilayah Prihatin yang diadakan di PPR Kampung Muhibbah, Kuala Lumpur hari ini. Baginda berkenan mengurniakan surat tawaran pemilikan rumah kepada 54 orang penerima terpilih. Seri Paduka Baginda dan Tuanku Permaisuri turut meluangkan masa bersama rakyat di majlis tersebut. Keberangkatan Seri Paduka Baginda berdua ke majlis ini mencerminkan keperibadian tinggi dan keprihatinan Seri Paduka Baginda berdua terhadap golongan yang tidak berkemampuan yang memerlukan bantuan untuk kelangsungan hidup mereka.

Program Rumah Wilayah Prihatin yang dilaksanakan oleh Kementerian Wilayah Persekutuan dengan kerjasama Dewan Bandaraya Kuala Lumpur (DBKL), Tenaga Nasional Berhad dan Yayasan Wilayah Persekutuan ini memberi peluang keluarga miskin tegar yang menjadi penyewa Projek Perumahan Rakyat (PPR) atau Perumahan Awam DBKL (PA DBKL) sedia ada memiliki rumah sendiri dengan lebih selesa.

Hak milik rumah di bawah program ini akan dipindahkan kepada penerima tanpa sebarang bayaran dengan syarat unit berkenaan tidak boleh dijual kepada pihak ketiga. Tetapi rumah tersebut boleh diwariskan kepada anak atau waris terdekat.

Kementerian amat memahami kesusahan rakyat dengan kos sara hidup yang tinggi di bandar. Oleh itu, melalui kerjasama strategik antara kerajaan, badan korporat dan NGO membolehkan kos pembaikan purata RM50,000 untuk setiap unit rumah dibuat termasuk barangan kelengkapan asas seperti barangan elektrik atau perabot mengikut keperluan.

Kementerian akan meneruskan program ini di bawah payung Cakna Asnaf sebagai obligasi sosial dan komitmen Kerajaan untuk menyediakan tempat tinggal yang kondusif kepada golongan isi rumah kumpulan B40. Pelaksanaan program ini adalah selaras dengan visi Kementerian bagi mewujudkan persekitaran prihatin melalui konsep Wilayah Persekutuan Wilayah Prihatin,

Kementerian dan agensi sentiasa memberi fokus kepada golongan berpendapatan rendah, ibu tunggal, OKU, golongan asnaf dan fakir miskin di Wilayah Persekutuan dalam mana-mana program yang dilaksanakan supaya mereka tidak terpinggir dalam arus pembangunan bandar. Saya berharap lebih banyak badan korporat dan swasta tampil untuk memberikan sumbangan bagi membantu golongan miskin tegar di bandaraya Kuala Lumpur supaya jurang penduduk miskin dapat diseimbangkan.

**Tan Sri TPr Annuar bin Haji Musa**  
**Menteri Wilayah Persekutuan**  
**10 September 2020**